

# मोनोग्राफ श्यामलाल शर्मा

डा. जोगिंदर सिंह

मोनोग्राफ इक ऐसी रचना होंदी ऐ जेहूदे च इक विशेष लेखक बारै इक्के थाहूरा पर सम्पूर्ण जानकारी प्राप्त होंदी ऐ। मोनोग्राफ उ'ने लेखकें बारै लखोआए ज'दे न, जि'दा भाशा, साहित्य ते अपने प्रदेश विशेष दे खेतर च कुसै चाल्ली दा बड़ा मता योगदान होऐ। स्व. श्यामलाल शर्मा हुंदी गिनतरी डुग्गर धरती दियें उ'ने मन्नियें- परमन्नियें शखसियतें च होंदी ऐ, जि'ने सांस्कृतिक गतिविधियें च हिस्सा लेई- लेइयै डुग्गर समाज दी भलाई ते सांस्कृतिक उत्थान दे कम्म करदे होई औने आहलियें पीढियें आस्तै स्वस्थ परम्परां छोड़ियां न।

मोनोग्राफ श्यामलाल शर्मा जम्मू कश्मीर कला, संस्कृति ते भाशा अकैडमी आसेआ डुग्गर प्रदेश दे मन्ने-परमन्ने लेखक ते आलोचक डा. सत्यपाल श्रीवत्स हुंदे आसेआ लखोआया गेदा ऐ। सत्यपाल श्रीवत्स होर हिंदी, संस्कृत, डोगरी ते अंग्रेज़ी दे लेखक ते आलोचक हे, जि'दा वाकी भाशाएं दे कन्नै-कन्नै डोगरी भाशा ते साहित्य गी बी अनमुल्ला योगदान ऐ। 13 दिसम्बर 2016 गी सत्यपात श्रीवत्स हुंदा सर्गवास होई गेआ ते एह मोनोग्राफ 2017 च प्रकाशत होआ।

मोनोग्राफ दे रम्भ च प्रो. वेद कुमारी घई, डा. जगदीश राज शर्मा ते डा. धनिराम शास्त्री हुंदे आसेआ स्व. श्यामलाल शर्मा प्रति प्रगट कीते गेदे विचारें गी प्रस्तुत कीता गेदा ऐ। त्रोंने विद्वानें दे विचार पढने कन्नै गै शर्मा हुंदे जीवन, समाज ते साहित्यिक सेवा बारै पता लग्गी जंदा ऐ।

इस मोनोग्राफ दी विशे-सूची च 15 विशे न ते परिशिष्ट च 6 लेखें दा वर्णन कीते दा ऐ। विशे-सूची दे विशे इस चाल्ली न:-

1. जन्म ते बचपन
2. शिक्षा
3. छात्र जीवन दियां किश म्हुत्तवर्णन रुचियां ते उपलब्धियां
4. राजनीतिक ते समाजिक गतिविधियें च सैहभागिता
5. जेल- यात्रां
6. समाजक जीवन
7. साहित्यिक संस्थें कन्नै जुड़ियै हिंदी ते डोगरी भाशें दी सेवा
8. राश्ट्री स्तर दे कवि सम्मेलनें ते लेखक सम्मेलनें दा अयोजन
9. डोगरी रिसर्च इन्स्टीच्यूट दी स्थापना ते उसदा मंत्रिपद सम्हालना
10. जम्मू-कश्मीर कला, संस्कृति ते भाशा अकैडमी दी अल्पकालक नौकरी
11. लेखन कार्य
12. मौलिक रचनां
13. अनुवाद कार्य
14. संपादन कार्य

## 15. निबंधावलियां

स्व. श्यामलाल शर्मा हुंदा जन्म जम्मू च अपने समें दे प्रसिद्ध ज्योतशी पं. परमानंद उपाध्याय हुंदे घर 25 जनवरी 1921 च होआ हा। श्रीवत्स होरें श्यामलाल हुंदे जन्म ते बचपन सरबन्धी जानकारी दिंदे होई उं'दे घर ते म्हल्ले दे सुखद वातावरण दा वर्णन कीते दा ऐ। जिसकरी श्यामलाल शर्मा होर इस मुकाम पर पुज्जी सके । शर्मा हुंदी शिक्षा बारै जानकारी दिंदे होई, उं'दे रणवीर हाई स्कूल, प्रिंस ऑफ वेल्स कालेज दी पढाई ते विश्वविख्यात भाशा-विज्ञानी डॉ.सिद्धेश्वर वर्मा हुंदे निर्देशन च पढाई-लखाई. पंजाब विश्वविधालय लाहौर थमां बी. ए. पास करने ते फही निजी तौर पर हिंदी प्रभाकर पास करने बारै विस्तृत जानकारी दिती दी ऐ।

उं'दे छात्र जीवन दियां रुचियां ते उपलब्धियां दस्सदे होई शर्मा हुंदे क्रिकेट खेडने, त'वी पत्रिका दा संपादन करने, डिबेटिंग सोसाइटी दे सक्रिय सदस्य, पुस्तकालयें च जाइयै पत्रिकां ते कतावां पढने, प्रो. शक्ति शर्मा हुंदे कन्नै ब्याहू ते बक्ख-बक्ख स्कूलें च अध्यापक ते मुखाध्यापक दियां नौकरी करने दा विस्तृत वर्णन कीते दा ऐ ।

राजनैतक ते समाजक गतिविधियें च सहभागिता शीर्षक तैहूत सत्यपात श्रीवत्स होरें श्यामलाल शर्मा हुंदे प्रजा-परिषद च शामिल होने, राश्ट्रीस्वयं सेवक संघ दी शाखाएं च जाने, 1947 ई. च देसै दा बंड होई जाने पर पाकिस्तान थमां औने आहूले शरणार्थियें दी सेवा, जेल- यात्रां, प्रेमनाथ डोगरा हुंदे कन्नै मिलियै लोकें दी बेहूतरी आस्तै कम्म करने ते डोगरा ब्राह्मण सभा च उप-प्रधान ते फही प्रधान दे पद पर रेहियै ब्राह्मण ब्रादरी आस्तै कम्म करने दी तफसीली जानकारी दिती दी ऐ।

साहित्यक संस्थें कन्नै जुड़ियै हिंदी ते डोगरी भाशें दी सेवा बारै सत्यपाल श्रीवत्स होर लिखदे न जे श्यामलाल शर्मा होरें गी अपनी मां बोल्ली डोगरी ते राश्ट्र भाशा हिंदी कन्नै बरोबर प्यार हा। हिंदी साहित्य मंडल दी स्थापना च इं'दा अहूम योगदान हा। शर्मा हुंदे आसेआ मंडल दी प्रधानता दे दरान राश्ट्री स्तर दे साहित्यकार सदियै कवि ते लेखक सम्मेलन करोआने बारै विस्तृत जानकारी मिलदी ऐ। एहू बी पता चलदा ऐ जे ओहू डोगरी संस्था दे कार्यक्रमें च बी शामिल होंदे हे।

मोनोग्राफ च श्री श्यामलाल शर्मा हुंदे डोगरी रिसर्च इन्स्टीच्यूट गी योगदान बारै विस्तृत जानकारी मिलदी ऐ जे उं'ने कि'यां- कि'यां इन्स्टीच्यूट दियें गतिविधियें गी अगें बधाया ते केई नमें लेखकें दा मार्गदर्शन बी कीता। केई राश्ट्री स्तर दे सम्मेलनें च होरनें साथियें गी लेईयै शामिल होंदे रेहू।

मोनोग्राफ च अगें श्यामलाल शर्मा हुंदे लेखन कार्य (मौलक रचनां, अनुवाद कार्य ते संपादन कार्य) बारै तफसील कन्नै दस्सेआ गेदा ऐ। सत्यपाल श्रीवत्स होर लिखदे न जे शर्मा हुंदे अंग्रेजी, हिंदी ते डोगरी च 100 कोला मते शोध लेख पत्र- पत्रिकाएं च छपी चुक्के दे न।

मोनोग्राफ च निबंधें दी पैहूली कताब 'त्रिवेणी' जेहूडी इ'नें अपनी धर्मपत्नी प्रो. शक्ति शर्मा हुंदे कन्नै मिलियै लिखी दी ऐ दे बारै विस्तृत जानकारी ऐ । इस कताब बारै शर्मा हुंदे विचार 'अपने पासेआ' गी बी मोनोग्राफ च शामिल कीता गेदा ऐ। एहूदे इलावा प्रो. सिद्धेश्वर शर्मा ते डॉ. हजारी प्रसाद दिवेदी आसेआ कीती गेदी 'त्रिवेणी' कताब दी प्रशंसा गी बी मोनोग्राफ च शामिल कीता गेदा ऐ।

श्यामलाल शर्मा हुंदे अनुवाद कार्य दी तफसीली जानकारी दे कन्नै-कन्नै प्रो. रामनाथ शास्त्री हुंदे आसेआ कीती गेदी प्रशंसा दे अंश बी शामिल ना। इस मोनोग्राफ थमां शर्मा हुंदे आसेआ कीते गेदे 6 अनुवादें दी विस्तृत जानकारी मिलदी ऐ। ओहू इस चाल्ली नः-

1. भागवत दियां कथां
2. बताल पचीसी
3. मेघदूत
4. अभिज्ञान शकुंतलम
5. पौ फट्टने पर
6. आत्मबोध

मोनोग्राफ च शर्मा हुंदे संपादन कम्में बारै सत्यपाल श्रीवत्स होरें तफसील कन्नै जानकारी दित्ती दी ऐ। श्यामलाल शर्मा हुंदा संपादन कम्म बडा सराहनेयोग ऐ। शर्मा होर ब्रह्मन्त्र प्रतिनिधि सभा दी पत्रिका 'ब्रह्मावानी' दा संपादन ते प्रकाशन करदे रेहू। डोगरी रिसर्च इन्स्टीच्यूट दे अपने कार्यकाल दौरान 4 निबंधावलियें दे संपादन ते प्रकाशन बारै तफसीली जानकारी मिलदी ऐ।

अगें इ'दे किश महत्वपूर्ण ते दुर्लभ 24एं लेखें दी सूची दित्ती दी ऐ। सत्यपाल श्रीवत्स होर लिखदे न जे, "इ'दे इलावा बी शर्मा होरें केई लेख जरूर लिखे होने न की जे एहू त 1976 तगर दे लेखें दी सूची ऐ, जदके उं'दी मृत्यु त 1996 च होई ही। पर मिगी सिर्फ उं'दे 1976 ई. तगर लिखे दे लेखें दी सूची प्राप्त होई सकी ऐ। एहू सारे गै भिन्न-भिन्न पत्रकें च छपी चुके दे ना।"

मोनोग्राफ दे खीर च श्रीवत्स होरें परिशिष्ट शीर्षक तैहूत 6 लेखें गी शामिल कीते गेदा ऐ। ओहू इस चाल्ली नः-

1. डॉ. सिद्धेश्वर वर्मा
2. खारा पुराण
3. डोगरी लोकगीतें च शपाही
4. डोगरा खुआन
5. डोगरी खेढ-गीत
6. डोगरा खान-लान

अखीर च इस मोनोग्राफ दे बारे च अस आक्खी सकनें आं जे जम्मू कश्मीर कला, संस्कृति ते भाशा अकैडमी ने स्हेई शख्सीयत पर स्हेई आदमी यानि सत्यपाल श्रीवत्स हुंदे आसेआ एहू मोनोग्राफ लखोआइयै सराहनेयोग कम्म कीता ऐ। सत्यपाल श्रीवत्स होरें पूरी लगन ते मेहनत कन्नै श्यामलाल शर्मा हुंदे पर मोनोग्राफ लिखियै डोगरी साहित्य गी अनमुल्ला योगदान दित्ता ऐ।